

RESOLUCIÓN DE ALCALDÍA

Vistas as BASES REGULADORAS PARA A CONCESIÓN EN RÉXIME DE CONCORRENCIA COMPETITIVA DOS “PREMIOS MENINA SARMIENTO – PONTEAREÁNS/AS DISTINGUIDOS DO ANO” POR PARTE DO CONCELLO DE PONTEAREAS.

Visto o informe emitido o 17 de novembro de 2025 polo Asesor Xurídico do Concello.

En base das facultades conferidas na vixente lexislación,

RESOLVO

PRIMEIRO.- Aprobar as BASES REGULADORAS PARA A CONCESIÓN EN RÉXIME DE CONCORRENCIA COMPETITIVA DOS “PREMIOS MENINA SARMIENTO – PONTEAREÁNS/AS DISTINGUIDOS DO ANO” POR PARTE DO CONCELLO DE PONTEAREAS, que figuran como Anexo á presente Resolución.

SEGUNDO.- Aprobar a convocatoria en réxime de concorrència competitiva.

TERCEIRO.- Os “Premios Menina Sarmiento – Ponteareáns/as Distinguidos/as do Ano” convocaranse unha vez ao ano, previa aprobación mediante acordo da Xunta de Goberno Local e posterior publicación no Boletín Oficial da Provincia.

CUARTO.- O prazo mínimo de presentación de candidaturas será de 5 días hábiles, contados a partir do día seguinte á publicación da convocatoria no Boletín Oficial da Provincia. Este prazo poderá ampliarse ata os 10 días hábiles se así o indican as bases da convocatoria anual dos premios.

D^a Nava Castro Domínguez

Alcaldesa de Ponteareas

(DOCUMENTO ASINADO ELECTRÓNICAMENTE)



Expediente: 7780/2025

ANEXO 1: PROPOSTA

BASES REGULADORAS PARA A CONCESIÓN EN RÉXIME DE CONCORRENCIA COMPETITIVA DOS “PREMIOS MENINA SARMIENTO – PONTEAREÁNS/AS DISTINGUIDOS DO ANO” POR PARTE DO CONCELLO DE PONTEAREAS.

EXPOSICIÓN DE MOTIVOS

O Concello de Ponteareas, consciente da importancia de impulsar e recoñecer aquelas iniciativas que contribúen ao desenvolvemento social, cultural, educativo, deportivo e económico do municipio, impulsa a creación dos “Premios Menina Sarmiento – Ponteareáns/as distinguidos do Ano”.

Estes galardóns nacen co obxectivo de poñer en valor proxectos e programas que ao longo do ano destacaron pola súa innovación, impacto positivo e capacidade transformadora no noso territorio. Trátase de recoñecer accións concretas que melloran a calidade de vida da veciñanza, fomentan a participación cidadá, potencian a identidade local e proxectan a imaxe de Ponteareas cara o exterior.

O nome “Menina Sarmiento” honra a figura de María Agustina Sarmiento de Sotomayor, a ponteareá inmortalizada por Velázquez en Las Meninas, converténdose nun emblema cultural e identitario que representa o orgullo de pertenza á nosa vila.

Con estes premios, o Concello de Ponteareas pretende instituír unha cita anual que combine recoñecemento, emoción e orgullo colectivo, visibilizando aquelas iniciativas que mellor exemplifican o esforzo, a creatividade, a solidariedade e a excelencia.

En base a todo o anterior, establécense as seguintes bases reguladoras.

BASES REGULADORAS

1) Obxecto e natureza

As presentes bases teñen por finalidade establecer as categorías, criterios e procedemento para a concesión anual dos “Premios Menina Sarmiento – Ponteareáns/as Distinguidos/as do Ano”, promovidos polo Concello de Ponteareas.

As distincións non xeran en ningún caso dereitos económicos, nin potestades para intervir no goberno ou administración municipal.

2) Categorías

Concederase, como máximo, un premio por cada categoría, podendo quedar deserta aquela na que non existan candidaturas que acaden méritos suficientes.

Na convocatoria anual, identificarase expresamente as categorías a convocar, podendo manterse as previamente establecidas ou crear novas categorías en función das necesidades, propostas ou interese xeral.



As categorías iniciais son as que se indican a continuación, nas que se describe tamén a súa finalidade:

- Cultura: Destácase á creación, promoción ou conservación das artes, o patrimonio, as letras e as tradicións locais.
- Educación, Ciencias e Investigación: Proxectos que impulsen o coñecemento, a innovación pedagóxica, o avance científico ou a mellora da formación da cidadanía.
- Empresa e Innovación: Iniciativas empresariais, profesionais ou emprendedoras que contribúan á dinamización económica de Ponteareas, á xeración de emprego ou á aplicación de solucións innovadoras.
- Compromiso Social: Labor solidario, de voluntariado ou pola defensa dos dereitos e o benestar da comunidade.
- Inclusión: Promoción da igualdade de oportunidades, a integración das diversidades (funcional, de xénero, cultural, etc.) e a eliminación de barreiras sociais.
- Deportes: Contribución á promoción da actividade física e en xeral aos valores deportivos.
- Nova Promesa (ata 25 anos): Promoción de iniciativas lideradas por mozos e mozas que sobresaian nun ámbito cultural, educativo, deportivo, científico ou social, representando o futuro e o talento da vila.
- Embaixada de Ponteareas: Promoción do nome de Ponteareas máis aló das nosas fronteiras, proxectando unha imaxe positiva e de prestixio da vila.
- Emigración/Aveciñamento: Promoción de Ponteareas no exterior con iniciativas asentadas en Ponteareas que contribúisen de xeito especial á integración, á convivencia e ao fortalecemento dos lazos coa comunidade local.

3) Requisitos das persoas ou entidades candidatas

Vinculación con Ponteareas: O proxecto ou iniciativa candidata deberá ter unha relación directa coa vila, ben sexa por estar deseñado ou desenvolvido en Ponteareas, por ter participación de entidades ou colectivos locais, ou polo impacto positivo e relevante no desenvolvemento da comunidade ponteareá.

Traxectoria e coherencia: As entidades promotoras deberán acreditar unha traxectoria de actuación coherente cos valores públicos de integridade, servizo á comunidade, respecto, inclusión, sustentabilidade e exemplaridade.

Situación legal: As iniciativas presentadas non poderán estar vinculadas con persoas físicas ou xurídicas inhabilitadas para recibir subvencións ou axudas públicas, nin estar sometidas a procedementos sancionadores ou condenas firmes que resulten incompatibles co recoñecemento obxecto deste premio.

Categoría “Nova Promesa”: Nesta modalidade poderán concorrer iniciativas impulsadas recentemente (cun máximo de dous anos de execución) que amosen potencial innovador, impacto positivo na comunidade e capacidade de consolidación no tempo.

4) Incompatibilidades

Non poderán ser propostas as persoas que formen parte do Xurado encargado da selección dos galardóns, nin aquelas que ostenten cargo electo municipal en activo, agás que presenten renuncia



expresa antes da súa candidatura.

5) Convocatoria e presentación de candidaturas

Convocatoria e prazo de presentación:

Os “Premios Menina Sarmiento – Ponteareáns/as Distinguidos/as do Ano” convocaranse unha vez ao ano, previa aprobación mediante acordo da Xunta de Goberno Local e posterior publicación no Boletín Oficial da Provincia.

O prazo mínimo de presentación de candidaturas será de 5 días hábiles, contados a partir do día seguinte á publicación da convocatoria no Boletín Oficial da Provincia. Este prazo poderá ampliarse ata os 10 días hábiles se así o indican as bases da convocatoria anual dos premios.

Modalidades de presentación:

- Institucional: propostas formuladas pola Alcaldía, as Concellerías, os grupos municipais ou entidades debidamente inscritas nun rexistro oficial de asociacións.
- Popular: propostas cidadás presentadas con un mínimo de 235 firmas ou a través do formulario dixital habilitado polo Concello (equivalente aproximadamente ao 10% da poboación do municipio).

Documentación mínima a presentar:

- Memoria xustificativa da iniciativa presentada da persoa ou entidade candidata.
- Apoios recibidos (en caso de propostas cidadás).
- Material acreditativo adicional, se procede (enlaces, recortes, informes, fotografías, etc.).

Lugar de presentación:

Rexistro xeral a través da sede electrónica do Concello de Ponteareas.

6) Instrución (comisión técnica)

A instrución das candidaturas será realizada por unha comisión técnica, integrada por 3 a 5 persoas funcionarias ou técnicas municipais, contando coa asistencia técnica da secretaría municipal.

Funcións principais da Comisión Técnica:

- Verificar que as candidaturas cumpren os requisitos formais establecidos nas bases.
- Solicitar a subsanación de documentación ou datos incompletos, dentro dos prazos que se determinen.
- Elaborar un informe de admisión das candidaturas, coas propostas motivadas para o seu envío ao Xurado.

Causas de inadmisión dunha candidatura:

- Falta de vinculación coa vila.
- Documentación insuficiente ou non subsanada dentro do prazo establecido.
- Incompatibilidades expresamente sinaladas nas bases.

7) Xurado



Composición: entre 7 - 10 membros, procurando equilibrio de xénero e representación diversa:

- Alcaldía: presidencia do Xurado, con voto de calidade en caso de empate.
- Ata un máximo de 3 persoas titulares dalgunha Concellería de Goberno.
- Ata un máximo de 5 persoas de recoñecido prestixio en ámbitos como universidade, cultura, empresa, tecido social ou deporte.
- Secretaría: persoal municipal con voz, sen voto.

Abstención e recusación: Calquera membro deberá absterse ou será recusado por conflito de intereses, como parentesco ata 2º grao ou relación laboral/contractual directa coa persoa ou entidade candidata.

O Xurado é soberano na valoración das candidaturas e poderá declarar desertas as categorías nas que non se cumpran os criterios de mérito establecidos.

Todos os membros do Xurado serán nomeados formalmente mediante decreto da Alcaldía.

8) Criterios de valoración

Criterio	Puntuación máxima	Nivel Excelente	Nivel Medio	Nivel Básico
Impacto obxectivo e medible	40	Resultados significativos, alcance territorial amplo e continuidade no tempo.	Resultados apreciables, alcance local medio e certa continuidade.	Resultados limitados, impacto local reducido e continuidade mínima.
Aportación a Ponteareas	25	Beneficio directo, relevante e duradeiro para a comunidade/localidade.	Beneficio perceptible pero non claramente sustentable.	Beneficio limitado ou pouco relevante.
Exemplaridade e valores	15	Comportamento íntegro, respectuoso, inclusivo e sostible; modelo de referencia.	Comportamento xeralmente correcto, con algunhas accións exemplares.	Comportamento adecuado pero con poucas accións destacables.
Innovación e orixinalidade	10	Enfoque pioneiro, creativo ou transformador; impacto novo ou diferencial.	Algúns elementos innovadores, pero con impacto limitado.	Pouca innovación ou enfoque moi convencional.
Traxectoria e méritos acumulados	10	Contribución consistente e relevante ao longo do tempo; recoñecemento previo.	Contribución estable, con algúns méritos acumulados.	Contribución recente ou méritos pouco relevantes.

A puntuación total por candidatura será a suma dos cinco criterios (máx. 100 puntos).

Poden declararse categorías desertas se ningunha candidatura acada unha puntuación mínima de 50 puntos.

9) Procedemento de concesión

Fase 1 – Admisión técnica e preselección

A Comisión Técnica verificará os requisitos formais, avaliará a documentación e elaborará unha lista de candidaturas admitidas.

Fase 2 – Constitución e deliberación do xurado

Constitución do Xurado: O Xurado será constituído formalmente mediante decreto da Alcaldía, garantindo o cumprimento das bases en canto a composición, equilibrio de xénero e representación sectorial.



Deliberación: O Xurado procederá á avaliación das candidaturas por categoría, aplicando os criterios de valoración e rúbrica establecidos nas bases. Cada membro emitirá puntuación individual segundo a rúbrica e achegará as súas observacións motivadas. As deliberacións serán soberanas, e o Xurado poderá declarar desertas as categorías nas que ningunha candidatura acade os estándares mínimos de mérito.

Fase 3 – Aprobación final

Proposta motivada: Unha vez avaliadas todas as candidaturas, o Xurado elaborará un informe-proposta para cada categoría, que será remitido á Xunta de Goberno Local para a aprobación final.

Da aprobación da proposta dos “Premios Menina Sarmiento – Ponteareáns/as Distinguidos/as do Ano”, darase conta ao Pleno da Corporación Municipal que se celebre a posteriori.

Confidencialidade: Todas as deliberacións, valoracións e informes do Xurado manteranse en réxime de confidencialidade ata a publicación do acordo de concesión.

Fase 4 - Notificación e aceptación

As iniciativas distinguidas serán notificadas formalmente aos seus promotores e deberán manifestar aceptación expresa.

10) Distintivos e protocolo

Entrega: Os premios entregaranse nunha Gala anual, coa data que se indicará expresamente na convocatoria dos Premios Menina Sarmiento – Ponteareáns/as Distinguidos/as do Ano.

A cada iniciativa distinguida entregaráselle un diploma acreditativo e unha peza conmemorativa, recomendándose a iconografía de Menina Sarmiento xunto con elementos heráldicos locais.

11) Rexistro, arquivo e uso do título

Todas as distincións serán inscritas no Rexistro Municipal de Distincións do Concello de Ponteareas.

O título poderá empregarse en biografías, comunicacións ou actos públicos, sen conferir precedencia protocolaria fóra dos actos oficiais municipais.

12) Calendario tipo

Fase	Data orientativa
Convocatoria	1 de xuño
Peche de candidaturas	10 de setembro
Avaliación e deliberación do Xurado	Antes do 20 de setembro
Aprobación final e Gala de entrega	Última semana de setembro

13) Disposición final

As presentes bases reguladoras entrará en vigor o día seguinte á súa publicación no Boletín Oficial da Provincia, e tamén serán publicadas no taboleiro de anuncios do Concello de Ponteareas.

Todo o non recollido nestas bases será especificado na convocatoria anual dos Premios Menina Sarmiento – Ponteareáns/as Distinguidos/as do Ano, garantindo así transparencia, coherencia e seguridade xurídica na aplicación das distincións. Calquera outra cuestión non prevista nestas bases será resolta pola Alcaldía.



D^a Nava Castro Domínguez
Alcaldesa de Ponteareas

